

東朝紀

五段

海上王 泌著

初太子讀書大本堂選民間之俊秀及公卿之嫡子入堂中伴讀謂之龍門秀才後以文華殿爲太子進講之所

宋學士景濂教太子之功居多因孫祚得罪連坐應死 高后遣奏請免其死 上未允太子泣諫亦未蒙恩太子計窮投金水河左右救止以聞上乃釋公竈之松潘

鈔法旣行 上命太子專董其事時僞造甚衆比

有得者一見卽知真僞蓋其機識在二印僞者不知

國初疏牘奏御 上一覽卽送東宮令叅決以觀才識後遂定制凡章奏必以副封啓東朝與實封同進

太子以二十五年夏薨將停群祀禮部當議如宋制從之

洪武二十五年九月十三日冊允炆爲 皇太孫詔曰曩古列聖相繼御宇者首立儲君朕自甲辰卽王位戊申卽帝位于今二十九年矣前者

操將練兵平天下亂偃天下兵奠生民于田里用心多矣及統一以來除奸暴去豪強亦用心多矣邇來蒼顏皓首儲嗣爲重嫡孫允炆以九月十三日冊爲皇太孫奉上下神祇以安民庶誥示臣民想宜知悉

皇太孫洪武三十一年閏五月十六日卽 皇帝位改明年爲建文元年追 懿文太子爲孝康皇帝

懿敬皇太子妃爲皇太后 常遇春女 冊妃呂氏爲皇后 后壽州人太常卿呂本之女八月詔書曰將呂

后之父呂本靈位與 太祖高皇帝同祀于西
宮正指此也

皇帝嗣位之初卽下明詔行寬政赦有罪蠲逋租
去事之妨民者明年以紀元賜高年米肉絮帛
民鬻子者爲之贖免田之租稅幾分遣使者問
海內所患苦者當廉平吏罪至死者多令活之
于是刑部都察院論囚視徃歲減三之二人重
犯法

上親擇二十四人爲採訪使以觀風謠給事華亭
徐思勉亦與焉又改建都察院

史衣又賜宴于新治以寵之

二年

元年使者還自西方得玉于雪山廣二尺色青先
是上在宮儲時嘗夢神致上帝命授以重寶及
是始應命工琢爲大璽方尺六寸九分親定其
文曰天命明德表正萬方精一執中宇宙永昌
名曰凝命神寶

上幸大學親祀孔子拜跪盥獻咸用享廟禮縉紳
聚觀皆思自奮以進庸于世
元年三月
處士高崑上時事一墾荒田二抑末藝三慎選舉
四開鐵冶

七月十一日賜學士董倫御書怡老堂三大字及
髹几玉鳩杖各一

十二月癸卯朔乘輿臨視殿壇戒飭百官滌牲省
器是月戊寅 上御奉天殿群公卿咸受誓戒
宿于齋宮明日巳卯出舍 皇邸尚食進素膳
及期行事自元旦至于祭天地開朗日月輝華
方當出郊龍旗徐行萬騎不驚山川草木皆有
喜色六軍百姓欣躍聚觀

上于乾清坤寧南北二宮間爲退朝燕處之殿置
古書祖訓于其中沉玩深思名之曰省躬方孝

孺奉 諭譔銘

王紳禕之子 皇上卽位召入翰林編摩 太祖

實錄王景新一作彰爲山西布政坐事謫雲南

上召爲侍讀同脩 太祖實錄

聞之故老言洪武紀年之末庚辰前後人間道不
拾遺有見遺鈔于塗拾起一視恐污踐更置階
坳高潔地直不取也

建文國破時削髮披緇騎而逸其後在湖湘間某
寺中或曰武當山至正統時八十餘矣一日聞巡按

御史行部乃至察院言欲入陳牒門者不知誰

何亦不敢沮既入從中道行至堂下坐于地御史問爾何人訟何事不對命與紙筆卽書云告狀人姓某太祖高皇帝長孫懿文太子長子以付左右持上御史謂曰老和尚事真偽不可知卽真也爾老如此復出欲何爲曰吾老無能爲矣所以出者吾此一把骨當付之何地耶不過欲歸體父母側耳幸爲達之御史許諾命有司守護飛章以聞上令送京師至遣內豎往視咸不識和尚曰固也此曹安得及事我爲問吳誠在否衆以白上上命誠往誠見和尚亦遲疑

和尚曰不相見殆四十年亦應難辨矣吾語若一事昔某年月日吾御某殿汝侍膳吾以箸挾一臠肉賜汝汝兩手皆有執持不可接吾擲之地汝伏地以口嚙取食之汝寧忘之耶誠聞大慟返命言信也上命迎入大內某佛堂中養之久而殂云

初逸時由地中出雲遊河南江淮間旣久入汴梁某寺題詩云寥落東南四十秋而今霜雪已盈頭乾坤有恨家何在江漢無情水自流長樂宮中雲影斷朝元閣上雨聲愁新蒲細柳年年綠

野老吞聲哭未休

太祖嘗問劉誠意朕長孫享天下當幾何劉對曰皇太孫骨氣不凡非富貴可久拘也 上問其由不答固問之劉曰此出家當得僊若嗣大位只四五年天下分 上曰令出家而以燕王爲嗣若何劉曰于理不可貽笑于後弗若令嗣大位而有難則避 上言何以預爲之所劉曰製一函藏度牒緇衣剃刀其中令遇難則啓之庶幾藉此以免且得天下者必燕王也燕王才度旣雄而北地常有王氣 上然之遂作牒函之

以遺建文至是果以燕王難披剃而遁燕王卽位削去劉誠意伯爵

建文在儲貳時與燕王同侍 太祖太祖出一對以觀其志曰風吹馬尾千條線建文對曰兩打羊毛一片氈燕王則曰日照龍鱗萬點金 太祖意以燕王氣象爲不小

建文未遜時先于大內蘭香殿聚珠衣寶帳及內帑珍異諸物殿上塗猛火油貯瀝青其中語親密宮人期以城破遜去舉火故當時以建文自焚死也

新刻
國朝紀終
國朝紀終



國家圖書館. NATIONAL CENTRAL LIBRARY, TAIWAN, R.O.C.